

**Qanoq iliorutta nunasiaataasimanermiit anniaatigisagut qaangersinnaavagut? Danmarkki qanoq iliornissaa naatsorsuutigaarput? Apeqquteqaat aallaavigalugu oqallisissiatut siunnersuut.**

(Inatsisartunut ilaasorta Aqqalu C. Jerimiassen, Atassut)

**Akissuteqaat**

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

Aqqalu C. Jerimiassen, Atassummeersoq, siunnersuummik matuminnga apeqquteqaat aallaavigalugu oqallinnissamat siunnersuuteqartoq Naalakkersuisut sinnerlugit qutsavigaara.

Kalaallit Nunaat Danmarkilu sunniuteqarluartumik saammaasseqatigiissappata tamanna oqaluttuarisaanitsinnut paasinneqatigiinnermik akuersaarnermillu tunngaveqartariaqartoq Naalakkersuisut isumaqarput. Tassungalu atatillugu inuit sunnertinneqarnikut oqaluttuassaat, misilittagaat aqquusaarsimasaallu aamma saqqummersinneqassapput.

Ullormi 9. juni 2022-mi Statsministeri Mette Frederiksen Naalakkersuisullu Siulittaasuat Múte Bourup Egede ataatsimoorlutik nalunaarutigaa, Kalaallit Nunaata aamma Danmarkip akornanni oqaluttuarisaanikkut qulaajaasoqassasoq. Piffissaq qulaajaaffigineqartussaq tassaavoq Sorsunnersuaq kingullermiit maannamut. Naalakkersuinikkut aalajangiinerit pingaernerit, pisimasut pissutsillu allat Kalaallit Nunaata ineriartorneranut imaluunniit Kalaallit Nunaata Danmarkillu akornanni pissutsinut sunniuteqarsimasut imaluunniit inuiaqatigiinnut kalaallinut kinguneqarsimasut oqaluttuarisaanikkut qulaajaanermi ukkatarineqassapput. Oqaluttuarisaanikkut qulaajaaneq ilisimatusartunit sumulluunniit attuumassuteqanngitsunit ingerlanneqassaaq, innuttaasunillu peqataatitsisoqarlunilu tamanut paasissutissiisoqassaaq<sup>1</sup>.

Kalaallit Nunaata Danmarkilu namminneq peqatigiillutillu oqaluttuarisaanermik qulaajaasarlutillu pisimasunut nassuertarsimanertik oqaluttuarisaanikkut qulaajaasoqarnissaanut attuumassuteqarpoq - 1985-imi Kalaallit Nunaannut ministeriusimasoq Tom Høyem 1953-imi Qaanaap innuttaasui nuutitaasimanerannut tunngatillugu Qaanaarmiunut utoqqatsersimavoq, 2014-imi Naalakkersuisut Saammaateqatigiinnissamat Ataatsimiititaliarsuaq pilersissimavaat kiisalu 2020-mi Statsministeri Mette Frederiksen "meeqqanut misileraataasunut" utoqqatserluni.

Oqaluttuarisaanerput sammilluarneqarnissaa Naalakkersuisunut pingaaruteqarpoq. Immitsinnut uparuaanissaq siunertarineqanngilaq. Pisimasunit ilikkagaqarnissarput, pisimasullu inunnut ataasiakkaannut inuiaqatigiinnullu annertuumik kinguneqartarsimaneri siunersisaralugit alloriaqqinnissaq siunertaapput.

Naalakkersuisut naliliipput, qulaajaanerup suliarineqarnera inernerilu taamatuttaarlu ilisimatusarnikkut suliat allat inerneru, soorlu assersuutigalugu "spiralilersuinnermik suliamik"

---

<sup>1</sup>Maannakkorpiaq suliassamat tunngavissiaq, qulaajaanermut tunngaviususaaq, Danmarkip Kalaallit Nunaatalu akornanni suliarineqarpoq. Suliaq taanna Danmarkimi Uddannelses- og Forskningsministeriamit Kalaallit Nunaannilu Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmit suliarineqarpoq.

misissuineq, pisimasunik saammaassisinnaanissatsinnut pingaarutilimmik aqutissiussissasut. Tamatuma saniatigut qulaajaanerit isummat pigiliutiinnakkat akiornissaannut aammalu Danmarkip Kalaallit Nunaatalu akornanni angusaqarfiulluartumik oqaloqatigiinnissannut pingaaruteqarluinnassapput.

Naalakkersuisuniit taamatut oqaaseqarluta inersuarmi pissanganartumik angusaqarfiulluartumillu oqallittoqarnissaa qilanaaraarput.